

یوہ آکاشوانی جموں بے نصرت چودھری تے طفر اقبال تیں خبر سُنو۔

HEADLINES

- ۱۔ جموں کشمیر مانہہ صحت غا شعبہ مانہہ ایک تاریخی تے بڑی تبدیلی دیکھی جارئی ہے جت 2 ایمر اسپتال، 12 میڈیکل کالج، 17 کریٹیکل کیر بلاک تے 3 ہزار 1 سو 66 صحت مراکز قائم کیا گیا ہیں۔
- ۲۔ سرکار نے جے کے بوس غا چیئر مین تے ایس سی ای آر ٹی گا ڈائریکٹر غی تقرری واسطے نوی سرچ کمیٹی تشکیل دتی ہے۔
- ۳۔ ویشنو دیوی یاترا مانہہ اضافہ غے باعث قریبی سیاحتی مقامات ور سیلانیاں غی بڑی تعداد دیکھی جارئی ہے۔
- ۴۔ ٹریفک پولیس نے ہدایت جاری کی ہے کہ جموں سرینگر قومی شاہراہ ور رات غے وقت سفر نہ کریں تے لین گا اصولاں ور سختی سنگ عمل کریں۔
- ۵۔ شدید سردی تے گھنی تھند غی وجہ تیں جموں مانہہ عام زندگی متاثر ہو رئی ہیں جد کہ محکمہ موسمیات نے 15 جنوری توڑی موسم خشک رہن غی پیش گوئی کی ہے۔

HEALTHCARE TRANSFORMATION

جموں کشمیر مانہہ صحت غا شعبہ مانہہ ایک تاریخی تے بڑی تبدیلی دیکھی جارئی ہے جس مانہہ بڑا پیمانہ ور عمارتاں تے اسپتالاں غی تعمیر مانہہ بھارتی حکومت غی مسلسل مدد شامل ہے۔ وزارت صحت تے خاندانی بہبود غی جانب تیں پچھلا کئی براں مانہہ خاص سرمایہ کاری نے مرکزی زیر انتظام مانہہ سحت غی سہولیات نانہہ مکمل طور ور بہتر بناویو ہے۔ جس تیں اچھو علاج نہ صرف شہراں توڑی بلکہ دیہی علاقاں، سرحدی علاقاں تے مشکل جغرافیائی علاقاں مانہہ وی دستیاب ہوو ہے۔ اس بڑی تبدیلی غی ایک اہم مثال یاہ وی ہے کہ ات 2 ایمر اسپتال، 12 میڈیکل کالج، 17 کریٹیکل کیر بلاک تے 3 ہزار 1 سو 66 صحت مراکز قائم کیا گیا ہیں۔

LG MAGAZINE

لیفٹیننٹ گورنر منوج سنہا نے ہندو ایجوکیشن ساسائٹی کشمیر غی جانب تیں شائع کی گئی سنگرمل میگزین غا خصوصی ایڈیشن غو اجراء کیو۔ اس موقع ور خطاب کرتا وان ایل جی موصوف نے کہیو کہ سماجی ہم آہنگی، ثقافتی تے روحانی ورثہ غو استعمال تے تعلیم نانہہ جوڑن آلا ذریعہ غا طور ور اپنانو، ایک بہتر مستقبل واسطے مضبوط بُنیاد فراہم کرے۔ انہاں نے کہیو کہ تیزی سنگ بدھتی وی ٹیکنالوجی تے عالمی دور غے باوجود، ماری قدیم روحانی تے ثقافتی وراثت، ماری مشترکہ عقیدت، روایت، فن، رسومات تے اقدار سماج غی تشکیل کریں تے ملک غی مجموعی ترقی نانہہ اگے بدھاویں۔

SEARCH COMMITTEE

جموں کشمیر حکومت نے سوموار نانہہ سکولی تعلیم بورڈ غا چیئر مین تے تعلیمی تحقیق ریاستی کونسل غا ادارہ غا ڈائریکٹر غی تقرری واسطے نام تجویز کرن آلی سرچ کمیٹی نانہہ دوبارہ تشکیل دتو ہے۔ آکاشوانی جموں غا نامہ نگار غے مطابق اس بارا مانہہ حکم نامو جنرل ایڈمنسٹریشن محکمہ نے جاری کیو ہے۔ جہڑو کہ 30 جنوری 2025 غا سرکاری حکم نمبر جے کے جی اے ڈی 163 غی جگہ نافذ کیو گیو ہے۔ نوی تشکیل دتی گئی سرش کمیٹی غا چیئر مین وین غا ایڈمنسٹریٹو سیکرٹری، پلاننگ، ڈیولپمنٹ مانیٹرنگ محکمہ، جد کہ اس غا ممبران مانہہ شامل وین گا، زرعی پیداوار محکمہ گا انتظامی سیکرٹری، جنرل انتظامی محکمہ گا انتظامی سیکرٹری، اعلیٰ تعلیم محکمہ گا انتظامی سیکرٹری، محکمہ تعلیم غا انتظامی سیکرٹری تے جموں کشمیر یونیورسٹی غا وائس چانسلر۔

TOURIST INFLOW

شری ماتا ویشنو دیوی مند مانہہ یاتریاں غی تعداد مانہہ مسلسل اضافہ ہون غے نال نال، قریبی سیاحتی مقامات تے مزہبی جگہاں ور وی سیلانیاں غی تعداد مانہہ نمایو اضافو دیکھیو جارہیو ہے۔ اس اضافہ تیں دوبارہ علاقہ مانہہ رونق چھا گئی ہے۔ جس تیں سیاحت غے نال نال مقامی معشیت نانہہ وی فائدو حاصل ہو رہیو ہے۔ مقامی تاجراں تے خدمت فراہم کرن آلاں نے سیلانیاں غی بدھتی تعداد ور خوشی غو اظہار کیو ہے۔ علاقہ غا کئی خاندان سیاحت تیں جڑا کماں ور ہی اپنو گزارو کریں تے امید ہے کہ موجودہ صورتحال ان غی آمدنی ور اچھو اثر کھلے غو۔ اپنا تجربات سانجہ کرتا وان گجھ سیلانیاں نے اس طرح کہیو۔

فصل غی کٹائی غو تہوار لوہڑی اج جموں خطہ مانہہ روایتی جوش و خروش تے رسومات غے نال مٹایو جارہیو ہے۔ قابل ذکر ہے جے لوک اس موقع ور شام غے وقت آگ بالیں، روایتی گیٹ گائیں تے ایک دوجہ نانہہ لوڑی غی مبارک باد پیش کریں تے ایک دوجہ نانہہ مٹھائی مونگ پھلی گچک وغیرہ تقسیم کریں۔ اس موقعہ ور لیفٹیننٹ گورنر منوج سنہا، وزیر اعلیٰ عمر عبداللہ تے جموں کشمیر غا کابینہ وزراء نے لوکاں نانہہ اس تہوار غی مبارک باد پیش کی تے انہاں نے کہیو کہ یوہ تہوار بھائی چارہ، ہم آہنگی تے ایک دوجا غا احترام غا رشتہ نانہہ مضبوط کرے۔ آکاشوانی گا خبراں آلا شعبہ سنگ گل کرتا واں مقامی لوکاں نے اس طرح کہیو۔

TRAFFIC ADVISORY

حکام نے سوموار آلے تہاڑے مسافراں تے چھوٹی گڈیاں غا ڈرائیوراں نانہہ ہدایت دتی کہ جموں سرینگر قومی شاہراہ ور رات غے وقت سفر نہ کریں تے تہاڑی غا وقت مانہہ ہی سفر کریں۔ آکاشوانی جموں گا نامہ نگار غے مطابق، ٹریفک پولیس نے اپنی ہدایت مانہہ کہیو ہے کہ ناشری ٹنل تے نویوگ ٹنل غے بشکار رات غے وقت پاری گڈیاں غی آمدرفت تیں مسافراں نانہہ کافی پریشانی پیش آئے اس واسطے اس تیں بچیں۔ ڈرائیوراں نانہہ کہیو گیو ہے کہ اپنی لین مانہہ رہ غے گڈی چلائیں تانجے ٹریفک جام نہ وے۔

11th & 12th DATESHEETS

جموں کشمیر بورڈ آف سکول ایجوکیشن نے جموں صوبہ غا گرمائی زون واسطے کلاس یارویں تے یارویں گا سالانہ ریگولر 2026 غا امتحانات ہون غی تاریخ جاری کردتی گئی ہے کلاس یارویں گا امتحانات 23 فروری نانہہ شروع ویں گا تے 28 مارچ نانہہ ختم ویں گا جد کہ کلاس یارویں غا امتحانات 28 فروری نانہہ شروع ویں گا تے 2 اپریل نانہہ ختم ویں گا طلباء تے والدین نانہہ مشورہ دتو گیو ہے جے وے تفصیلی ڈیٹ شیٹ واسطے جے کے بوس غی سرکاری ویب سائٹ نانہہ دیکھیں۔

VETERANS RALLY

بھارتی فوج نے اے ایل جی راجوری مانہہ سابق فوجیاں غی ایک بڑی ریلی گو انعقاد کیو جس مانہہ سابق فوجیاں ویر ناریاں تے ان گا خانداناں غی فلاح و بہبود واسطے اپنا مضبوط عزم غو اعداں کیو ریلی مانہہ سابق فوجیاں، ویر ناریاں تے ان ور دارو مداد افراد سمیت 2 ہزار تومنا افراد نے شرکت کی اس تقریب نے شکایات نانہہ دور کرن تے بکھ بکھ فلاحی سکیمان گا باری مانہہ بیدادی پھیلاں واسطے ایک اہم موقع غا طور ور کم کیوقابل ذکر ہے جے اس تقریب مانہہ کھیڈ گا وزیر ستیش شرما نے مہمان خصوصی گا طور ور شرکت کی جد کہ شمالی کمانڈ غا فوجی کمانڈر تے 16 کور غا جی او سی وی اس موقع ور موجود تھا اجتماع سنگ خطاب کرتا واں وزیر موصوف ستیش شرما نے اس طرح کہیو۔

SHEEP HUSBANDRY RBN

مشن یوا پروگرام غے تحت پیڈ پالن محکمو نوجوانان نانہہ کاروباری مواقع فراہم کر رہیو ہے اس سکیم غے ذریعے نوجوان خد روزگار کمان واسطے مالی معاونت تے سب سڈی حاصل کرسکیں جس مانہہ پیڈ پالن تے اس سنگ منسلک شعبہ شامل ہیں انٹیگریٹڈ شیپ ڈیولپمنٹ سکیم خاص طور ور پیڈ پالن نانہہ فروغ دین واسطے بنایو گیو ہے جس غو مقصد نوجوانان نانہہ اپنا کاروبار گا انتخاب مانہہ بالاختیار بنانو ہے اس پروگرام غے تحت بکھ بکھ کاروباری سرگرمیاں واسطے سرمایہ تے سبسڈی فراہم کی جارہی ہے۔ اس بارے مزید جانکاری دیتا واں ضلع پیڈ پالن بارے محکمہ گا افسر ڈاکٹر شبیر احمد خان نے اس طرح کہیو۔

FOOTBALL PREMIER CUP

جموں کشمیر کھیڈ کونسل نے جموں فٹ بال پرمیئر کپ 2026 غو اعلان کیو ہے جہیرو جلد ہی منی سٹیڈیم پریئر گراؤنڈ جموں مانہہ شروع ہون آلو ہے نوا ٹورنامنٹ غو مقصد شہر مانہہ فٹ بال نانہہ فروغ دینو تے مقامی صلاحیت نانہہ ایک پلیٹ فارم ور لیانو ہے ٹیمیاں واسطے اندراج بلکل مفت ہے تے دلچسپی رکھن آلا شرکاء 9086310017 یا 7889424922 ور رابطو کر غے اپنو اندراج کرا سکیں۔ کھیڈ کونسل نے شائعین ور زور دتو ہے جے وے مقابلہ تے ٹیمیاں بارے، دیگر تفصیلات توں باخبر ریں۔

WEATHER

سوموار نانہہ مرکزی زیر انتظام علاقہ مانہہ سخت سردی غی لہر جاری رہی، جس غی وجہ تیں عام زندگی تے کاروباری سرگرمی متاثر ہونیں، حالانکہ علاقہ گا زیادہ تر حصاں مانہہ درجہ

حرارت پچھلا دنان غے مقابلا بہتر رہیو۔ آکاشوانی جموں غا نمائندہ غے مطابق، جموں گا میدانی علاقان مانہ سویرے غے وقت شدید تھند غی وجہ تیں گڈیاں غی آمدرفت بری طرح متاثر ہوئی۔ جدکہ خراب موسم غے باعث بازاراں مانہ لوکاں غی تعداد کھٹ رئی۔ ریڑی پھڑی تے چھوٹا تاجراں نے دسیو کہ کاروبار کھٹ رہیو کیونجے لوک کھراں مانہ رہنو پسند کر رہیا ہیں۔ ایک دکاندار نے اس طرح کہیو۔ محکمہ موسمیات غی پیشن گوئی ہے کہ 15 جنوری توڑی موسم زیادہ تر خشک رہ غو، جدکہ 16 تے 17 جنوری غے بشکار اچا علاقان مانہ ہلکی بارش تے برف باری ہوسکے۔

NEWS READ BY NUSRAT
NEWS READ BY ZAFFAR IQBAL
NEWS EDITOR KUNAL SHRIVATSA
SKILLED RAJAT
TECH ASST RAJESH
DEO NUSRAT